

四庫全書

集部

欽定四庫全書

集部

圭塘小藁卷

十三

詳校官編修臣錢 極

中書臣劉源溥覆勘

總校官編修臣王 燕緒

校對官主事臣陳 埔

謄錄監生臣鄒世俊

欽定四庫全書

圭塘小藁卷十

元 許有壬 撰

碑志

勅賜故資德大夫御史中丞贈撝忠宣憲協正  
功臣河南行省右丞上護軍魏郡馬文貞公神  
道碑銘并序

至正七年七月丁丑集賢侍講學士通奉大夫兼國子

祭酒臣天爵言故資德大夫御史中丞贈據忠宣憲協正功臣河南行省右丞上護軍追封魏郡公謚文貞馬祖常早擢高第歷踐要途始終五朝有文有政宜賜碑紀德庸示報功集賢院以聞制可命臣有士為文臣立為書臣起巖篆其額三人皆文貞公同年進士而有壬託知尤厚始以學士被命繼冒承旨皆職紀述其敢辭公字伯庸世永古特郡居靜州天山有錫喇濟蘇者高祖也金季為鳳翔兵馬判官死節贈桓州刺史廟賜褒忠

子孫因官以馬為氏曾祖烏呼訥從世皇征宋留汴掌  
饋餉累官禮部尚書贈推忠宣力翊運功臣僉樞密院  
事謚忠懿祖世昌行尚書省左右司郎中贈嘉議大夫  
吏部尚書父潤朝列大夫同知漳州路總管府事贈中  
奉大夫河南行省參知政事追封梁郡公妣楊氏追封  
梁郡夫人梁公官浮光因家焉公七歲知學得錢即以  
市書十歲見燭敲燒屋解衣沃水滅之人嘆其異蜀儒  
張公順講經儀真公未冠質以疑義數十張公奇之科

舉詔下鄉會試皆第一廷試第二蓋以國人冠也授應奉翰林文字承事郎同知制誥兼國史院編修官拜監察御史仁皇久正宸極猶居東宮近侍利燕飲得請公抗言當御正衙立朝儀御史執簡太史執筆雖有懷姦利已乞官賞者亦不敢出諸口承天地祖宗之重當極調攝至於酒醴近侍進御當思一獻百拜之義英廟為皇太子請慎簡師傅下至臣僕亦宜精擇時大姦當國公首知其盜觀國史洎同列疏其十罪仁廟震怒罷之

黨與之布要地者皆論列黜之端人昔與抵牾而擯斥者請拔用之泰州山移公言山不動之物而今動之豈在野有當用不用之賢在官有當言不言之佞大臣皆家居待罪薦賢拔滯知無不言改宣政院經歷月餘辭歸起為社稷署令罷雜事于泉州大姦復相左遷閑平縣尹欲中傷之退居浮光大姦死除翰林侍制泰定建儲擢典寶少監太子左贊善尋兼翰林直學士成均釋奠陳太子視學之禮內出禮幣命公助祭除禮部尚書

祖母張夫人卒護喪歸起為右贊善復禮部尋辭歸天  
歷初再使召為燕王內尉仍入禮部兩知貢舉一為讀  
卷官時號得人參議中書省事參定親郊典儀充讀祝  
冊官禮成賚金幣拜治書侍御史賜犀帶及御書奎章  
閣記內庭宴服七襲金玉腰帶各一改徽政副使拜南  
臺中丞今上即位召議新政賚白金為兩二百楮幣為  
貫萬金織綺為端四改同知徽政院事拜御史中丞以  
公疾特免朝禮命光祿日給上尊知經筵進說必陳經

史大義參以祖宗故實持憲務存大體西臺御史劾其  
僚禁酣時面有酒色以苛細黜之山東憲以孔氏訟聞  
以事關名教不行按者亦引去司憲有以貪墨敗沒入  
其田廬請歸曲阜林廟從之拜樞密副使居無幾辭歸  
復南臺中丞遷西臺疾不赴積階自承事郎至資德大  
夫至元四年三月丙午薨于光州之第得年六十是年  
四月壬申葬州北平原鄉西樊里有司以聞有令贈謚  
配索氏封梁郡夫人子男二武子承事郎湖廣行省檢

校官文子徵事郎秘書監著作郎孫男三女二公言事  
剴切嘗言國人暨諸部既誦周孔書當尊諸母以厚彝  
倫兵家子驕脆有孤任使庶人挽強蹶張老死草野當  
建武學武舉儲材以備非常時雖不用識者隄之至於  
論刑一本哀矜嘗言死罪遇赦且原減死流徙未蒙殊  
渥當驗情遇恩內徙漢人滿百執弓矢獵者不及百者  
流條格已有禁弓矢聚眾之條又復為此是錯綜網羅  
之誠恐愚民舉足蹈罪至論建德民妻之不首夫死者

則當以必死其得用法之意乎國家涵濡百年譽髦斯  
士公先世已事華學至公始大以肆為文精核務去陳  
言師先秦兩漢尤致力於詩凌轢古作大篇短章無不  
可傳者與修英廟實錄譯潤皇圖大訓承華事略編集  
列后金鑑十秋記若干卷至順間龍虎臺應制賦詩有  
玉食之賜嘗進擬藁為之歎曰孰謂中原無碩儒乎文  
集若干卷臺檄刺之揚州郡庠仁皇始行貢舉國人而  
下列為四色國人洎諸部為右榜試目視左榜差優公

雖右榜左列及之者指未易屈焉且其為學初不為貢舉也以挺特之資丁大明之會袞為舉首馴至達官威重足以鎮薄俗文章足以追古作議論足以正風教設科得士不得不以延祐之時為盛也不幸壽僅六十未究其用悲夫銘曰

元大一統六合同風南臺北萊先生其中部族有儒文貞伊始文貞之世翼翼廟祀後承聿修講學諸夏延界至公有大無撫嶄然異稟幼不事弄濡衣撲燎智劇碎

覽益習以進益混以滯不溺于流而登于岸先秦兩漢  
華咀實擷天籟冷厲石湍激冽天子有詔乃興乃賓實  
三其魁一推國人甫試館職條我笏冠以爾杓鑿安我  
考槃遐心浮雲東帛空谷春坊翊贊經筵啓沃皇格于  
天公司其度俊造鑑衡風紀砥柱厖恩異數川委充溢  
云胡修途六十而杌既易其名亦大其封于光之原賜  
碑崇崇賜碑崇崇於赫厥銘同年之紀考信匪謳惟爾  
部族文貞有躅敘倫敦典益介戢穀

元故右丞相克呼神道碑銘 幷序

天厭宋金之不能君其民也篤生大有為之君以君之我太祖聖武皇帝順天應人龍飛朔方豪傑雲從四傑而下傳功輩出若丞相鎮海蓋較著者也五世孫僉河北河南道肅政廉訪司事哈斯狀其故請曰丞相奮庸天造名具秘史世莫得聞子孫席世少文封謚稽稽諸麗牲有石而無銘封謚在官銘不在子孫乎敢再拜請愚昔長史館與修功臣傳家報疏列至有炳炳在人子

孫不能具一言一事者竊嘗撫其後而悲其先也僉憲  
殖華學穎出羣從思弘世德嘉其能後故不讓而筆之  
丞相名扎哈即青哈系出克呼氏或曰本田姓至朔方  
始氏克呼或曰實克呼族時同名者三因主屯田故加田  
別之有勇畧善騎射從征屢有功歲丙寅長百夫從宗  
王百官於班珠爾烏訥格河同盟恭上太祖青吉斯皇帝  
尊號倚注日密晝不釋鞍夜不解帶為扎爾固齊破迪  
延國賜御馬一破克木楚國汪國魯國賜珠旗金虎符銀

印為埒里巴總屬官金符十人銀符五十人征塔塔爾  
欽察唐特哲袞回回契丹女直皆有功承命闢烏哩揚  
歡地為屯田且城之因公名名其地曰鎮海又曰青海  
俾公守焉局所俘萬口居作後以其半不能寒者移弘  
州孫達噶濟襲監弘州及其局風宜春棟屑供天庖若  
諸樹藝為設提舉以司之亦以公子孫世其職時諸蕃  
略定遂南牧至撫州與金將呼察和斯戰流矢中右臂  
紿其衆謂不傷裏瘡復戰竟拔其城賜白金俾為後證

既拔燕都命公登大悲閣環射四矢所至市舍悉以賜  
之尋受顧命奉太宗登極收天下符節獨公聽留復以  
貴戚金符官隸麾下拜中書丞相偕塔齊爾蘇布特取  
汴京河南河中入內省得九龍旗乘輿椅蓋卷以賜公  
中原既定錫恩州三百戶為實封世食其賦為置官守  
始立中書省尚左公為左丞相繼尚右改右相歲乙未  
八月二十一日薨於家上惜悼不已賜金幣治喪命百  
官致祭葬弘州北阜立祠其上憲宗嘗拊髀嘆曰使吾

得鎮海江淮何憂惜其亡矣世祖立極又以公舊部及降虜千人為匠局命公之孫章嘉為千戶曾孫伊埒布哈為百戶世所謂十七投下此其一也在干戈中每以進賢為急河西得伊勒吉齊匠官德磋商後其子皆為名臣陰陽羅丹仕至大司徒得儒十三人後皆知名夫人烏蘭必濟世祖所賜嬪妃也初克蔡俘金公主某亦以賜公子男一十二人曰約蘇穆爾為扎爾古齊佩金符約蘇穆爾之曾孫托和齊益州路千戶玄孫布哈襲中衛

千戶曰博果斯從世皇有功雲南為濟南益都宣慰使  
曰克埒濟蘇僉憲高祖也孫若干人曰八十八僉河東  
道廉訪司事阿勒坦布哈淮東廉訪副使曾孫托里靖州  
路達魯噶齊僉憲大父也子孫繁衍碑不具載世有恒  
言飲水黑河最為勲舊公實與馬國史曰托卜齊雅至  
秘也非有功不紀公名在焉錫戶樹官傳之子孫祖宗  
來可屈指公則二焉即是觀之豐功盛烈雖家乘紀述  
容有逸畧而其皭然大者不可掩也銘曰

雲雷經綸屯將作解元氣鼓動大塊斯噫豐隆屏翳相  
為後先亭之毒之以基我元於赫代工開天伊始同盟  
黑河有如白水轍環扈征何堅不摧戰功曰多我實有  
之珠旗揚揚金符煌煌從官如雲君賜以彰天荒既當  
有城翼翼樹藝告成百工以集郢律回春奏食靡艱俾  
爾子姓世戶厥官族鋒雖利吾忘吾脅恬然不傷嬰鋒  
蹀血拔燕論功旌以殊禮四矢所至悉公之邸帝曰汝  
賢其長中書汴蔡底平金社遂墟眎功頌賞賜戶三百

世掌食采設官永額不憊首離優游考終九重震悼賻  
腆祭豐弘惟桐鄉庸昭崇報有穹其封有恤其廟秘史  
紀名永終不墜顧是刺文益示揚厲

大元故贈光祿大夫江浙等處行中書省平章  
政事柱國追封趙國公阿都哈雅公神道碑銘

并序

江南行臺御史大夫阿爾斯蘭哈雅致政家居遣其子都  
水少監摩歡奉家乘請曰老夫賴先世餘澤竊祿位有

年而吾父平章公墓尚未表非慢也顧盛滿難居功名  
鮮終恒懼不克負荷遺羞丘壠君恩如天幸賜骸骨養  
疴田里年且八襄吾知免夫子知我其銘之有士讓不  
獲本其狀序曰平章公諱阿都哈雅輝和爾氏世為高  
昌望族祖伊囉勒鄂蘭登達登達華言巨室也贈中奉  
大夫河南江北等處行中書省參知政事護軍范陽郡  
公祖妣鄂特戰追封范陽郡夫人考諱哈喇阿爾斯蘭  
都木達當太祖肇建區宇國事克都護發兵攻金斬其

長史聞摩勒齊爾有異遣將命偕徹爾四人馳告行在且  
具欵誠上曰果如爾言其告爾主以方物來對曰皇帝  
幸生活高昌高昌身且不敢有何有方物復命輦寶貨  
金織段以獻由是高昌內附因留宿衛從太祖南征卒  
于柳城贈資善大夫湖廣等處行中書省右丞上護軍  
范陽郡公妣雅克塔納追封范陽郡夫人公宿衛積勞除  
塔山屯田打捕捉舉不就卒于京師昭回里第年七十  
一墓城西小南莊之原贈光祿大夫江浙等處行中書

省平章政事柱國趙國公配巴哩璉塔噶封柳城郡太夫人卒于濟南年八十四大夫時長憲山東護柩歸祔子男二長大夫也次賽音哈雅同僉宣徽院事早卒嗚呼世臣大家上有啓而下有承得以世濟其美者公一門其庶幾乎公性恂恂而志趣超詣由近侍出官非其志也嘗曰我先人有大造於高昌氏子孫必有興我不心為也夫以右丞之賢明畏天之義一介往來舉危亡之國而措之安遇知太祖天苟引年居高位享厚祿必

矣乃鬱而不發蓄而不泄至公又植而不食必再世而後顯是蓋遲速之有時非人力之所能及而啓之於前者固已逢涌而不可遏公卒時大夫已拜南臺御史流澤之來浩乎其沛然矣其浮雲富貴優游以老宜哉大夫以卓越之才起家監縣為良吏入臺為材御史出廉諸道為剛明使者入中書分南臺為天子重臣歷九朝官二十七轉天下識與不識皆知其名而又躬服儉素衣無錦繡居無華飾榮寵方至退然若虛文皇嗣位聖

眷益隆玉帶上尊錫賚相望至為玉刻署押以示殊遇  
當是時苟假寵于上為先世要美謚作豐碑亦何求不  
得顧乃自抑若不能加於其先有於其身者必遲回以  
待於致事又遲回以至於今日不請於上不謁於太常  
擇所宜為者自為之視世之朝暴貴而夕簷賜碑者有  
間矣二子長少監也次伊嚕哈雅少監二子布格博索  
俱宿衛內廷公生世為賢子為賢父歿而享其寵嘉出  
於尋常身大官無聞者萬萬也其可銘也夫銘曰於維

趙國作德于逸而小心以繹不柔以忮不競以亟以承  
其先烈以裕其胤息其先伊誰實為右丞子子其征屬  
屬其盈高昌之望曰命靡常主命不辱而天威肅將輦  
其金珍篚厥玄黃歸我聖皇以敉寧一方大夫繩武不  
遠伊邇右丞有孫趙國有子坦坦如砥矯矯如矢維天  
子使靡不極所止宜爾錫爾山峙川委繫來世之祉城  
西之原有樹有封刺銘豐碑百世可宗

故承務郎江西等處儒學副提舉葉先生墓碑

承務郎江西等處儒學副提舉致仕葉先生諱瑞字宗瑞遠祖祖洽宋熙寧間廷對魁天下曾孫廷秀由邵武徙建昌新城春秋擢第官至朝請大夫知梧州言事忤旨仰藥卒子遠宣教郎奉柩歸次米石而溺孫茂祖甫四歲母饒夫人抱以依姑趙趙居而教育之因為金溪人中鄉貢進士舉娶趙生四子先生其叔子也幼尚氣節致力經學以及百家皆得旨要其為舉子業不踰時習或戒以希有司旨先生曰吾為是區區而悖吾師說

乎益篤志為己之學進士公卒先生甫冠贊產悉分弟  
妹而躬耕以食趙夫人卒兄弟四出先生獨力營治久  
乃幡然曰昔親在不敢離親亡矣充吾學為揚顯者不  
力可乎歷甌越會稽瑯琊涉汶泗過洛入秦道晉以達  
幽朔無所遇最後至遼東世臣洪氏以好儒聞闡義學  
方難其師有以先生文行言於平章君祥右丞重喜者  
及見大悅館而師焉諸子彬彬以文學濟其世美遼東  
之人翕然知向學者先生力也朝廷以右丞薦授遼陽

路儒學教授再調大寧路陞將仕郎江洲路湖口縣主簿攝尉事盜久逸者皆獲之憲司檄按德化縣疑獄即得其情覈虛糧決滯訟縣以治聞轉撫州樂安務提領俄請老授前官至順二年十一月二十五日以疾終於家壽八十有五某年某月某日葬某處娶趙氏生子順女適孔景仰繼黃氏生子升寧都州夏河寨巡檢女適湖口縣典史杜復亨繼王氏生子大有庶宜春揚橋務提領女適高安白沙寨巡檢孫鐵柱孫男三人鎮綱繹

女三人先生年五十始出卒能致官而行其學迹徧海內乃得返鄉里至於休致而終于正寢雖用不盡其施而教之振于東善之淑於人者多矣遺文四十卷庸學提要六卷周易釋疑十卷於庫博矣哉中原貢舉廢將九十年江南亦四十年某少時先公教之曰金源分裂且事貢舉國家之大未有不行但遲速有時彌力學以俟當有際也時混一才二十年故老尚多幸及從學粗有得也尋以校職從事山北憲貢舉詔下乃棄而應薦

先生實主文遼陽科制廢久內地有所不悉遼陽在東  
僻有司一切昧於奉行先生纖悉教之蓋江南內附時  
年已三十餘矣習於場屋條制者也監試僉憲田時佐  
曰微先生幾不能奉詔有壬既獲薦文入禮部經問之  
奧策問之切見者莫不贊異先生在湖口方鳴金鼓行  
江有壬歸省臨江遇之中流歡甚至順庚午有壬為兩  
淮轉運使先生惠然肯來年八十四矣飲食起居猶昔  
也手寫大學中庸二書注字如蠅頭以與小兒留月餘

歸明年遂沒又八年升來武昌請銘將刺之阡茲銘也  
其誰宜為銘曰

於虜先生志壹學醇友善行道恥為鄉人昔隘分裂佔  
卑苟安四海既一我轍乃環有韞未櫟貲用不售爾不  
知我不滿覩晚慕幼安片帆遼東有命自天舉比畀  
公俊造賓興墜緒孰繹紹遠遷公張此東僻樂育嘉惠  
侏離伊吾糾邑司征曷究我書八十五年口不藥劑禔  
身所遺根茂實遂旅無所容道路屏營歸來正首於虜

先生

故通議大夫江西等處榷茶都轉運使萬公神道碑銘并序

公蒙古人卓特氏小字萬嘉閭長因為名國俗也既華學友字以國卿其家廣平蓋曾大夫天造初穎右部分戍地也大父哈尚從討李璮攻襄樊鄂渚皆有功贈中順大夫同僉樞密院事上騎都尉范陽郡伯配欽察氏葉氏皆追封范陽郡君父孟克圖右衛親軍百戶達魯

噶齊佩銀符陞福州新軍千戶達魯噶齊佩金符贈亞  
中大夫僉太常禮儀院事輕車都尉范陽郡侯配欽察  
氏追封范陽夫人德善履歷具神道碑公守河間有士  
待罪政府江西茶政不修擇習而健廉而通者為都轉  
運使以拯之公嘗貳其司有聲乃薦之廷議翕然既奏  
可傳符至郡俄以疾卒至正二年四月二日也五月二  
日葬曲周縣先塋壽六十有五明年九月孤壽安走安  
陽謁銘哭不能禁拜已出行實復咽不能語有士交公

厚望其孤已泣又洞其慤誠益為之動遂相與大哭久乃始克讀其狀其善狀不能悉也公居嫡長世祿當襲以讓弟諾海服勞宿衛除山北道肅政廉訪司照磨兼管勾承發架閣庫以太常憂歸服除調山東道賑饑有功南臺辟為行人俄除利用監知事又改南臺管勾承發照磨兼獄丞拜西臺監察御史論列剴切僉雲南諸路肅政廉訪司事麗江宣撫達魯噶齊揚珠布哈橫甚逐同官激判郡內朝廷知之始懼而亡憲公以臺檄出

罷之復其同官者以息行部建廟學凡二十四所修廢  
驛二十一歸省太夫人京口及侍其疾扶柩至廣平復  
如京師遷祖考妣合葬先塋改僉江西道又改燕南皆  
以憂不起服除改河南道天厯之警行省臣與廉訪司  
協議公謂潼關守不可緩承制除河南行省郎中出守  
潼關文皇道汴錄其勞除河南道副使潼關失守夜馳  
至行省發蒙古軍四十人又借民丁出帑資假富室以  
足軍興鼓行而西遂復奪之會朝廷遣使退其師還卒

掠民子女皆奪歸其親賜綵段上尊初額森勇將兵禦  
西師屯彰德約備芻粟已竭宿留不進士卒將大肆掠  
公開諭以理遂移衛輝境益始約有備之地一郡幾亂  
賴公以免擢同知中政院事理財江浙仍有金帛之賚  
改儲政院判官拜監察御史按覆諸道風采肅然為戶  
部郎中楮幣壅滯督焚以通之倉儲積弊立法以嚴之  
閩中去京遠選人間關故事三年遣使即江浙省銓授  
公以選行就除行省左右司郎中茶司復立授同知江

西等處榷茶都轉運司事分治湖廣江西江浙課以登  
商旅以通官庶以不擾入為戶部侍郎復通州倉糧三  
十萬石行蜀拯鹽法之弊人謂得宜陞內宰甫月改河  
間路總管兼諸軍鄂囉總管管內勸農事首建學宮若  
干楹百廢修舉胥畏民悅榷茶劇任知公者咸謂必稱  
而倏焉長往惜哉積階自將仕佐郎至通議大夫配沙卜  
珠氏封范陽郡夫人又娶趙氏在南每憂無子有士解  
之曰以子之心不患無子後果生子壽安也愿而有立

室而有出公可無憾矣女四人適國子生旺扎勒布哈江  
浙行省理問瑪固德呼宿州同知王敏行一未行第二  
人諾海自襲官有聞四轉至鎮江上萬戶府達魯噶齊  
階太中大夫曰庫楚宋氏出也公幼有志節襟度宏朗  
滑稽微中機鋒叵測分部上京它曹官莫不舍其署雜  
還相從其為人悅慕若此而疾惡若仇辭色不能隱亦  
用是來議者之口焉左營巡院判官王克觀泊其家五  
人相繼死為俱載歸葬之道高郵十路都萬戶府知事

龍寶臣出使卒殯水濱捐金顧江道士遷其柩歸葬曲周顯官有放其子者孫且十歲一日過之因言父子天倫甚至乃蹙然問曰君子幾歲公曰尚少當今來拜明日挈其孫往其人撫愛不釋公曰此兒與君有骨肉親錯愕久之乃語之曰此君之子某之子也遂大慟奉楮幣銀酒具為謝受之還遺其子卒為父子子今亦顯微公則天倫或幾乎絕矣其篤於行義若此與大權貴舊而狎不敢遠亦不近之免趨附之逮其讀書好文蓋太

常教之有素而復天資穎悟喜交儒士灼然有見於道  
義故確然無間於吾徒也山北南臺暇必相從有酒必  
共先太夫人棄代維揚自京口來轉南歸過之戀戀不  
忍別騎送至金陵東郭始泣而歸中途宿旅邸疲甚而  
寢心詭撼使寤笑談達曙目不少瞑翼日神觀不少眴  
瘦京師僕僕多事亦撥冗過從又同扈上京交游厚且  
久它人不及也銘復有辭銘曰

有紫其服有金其符賞延在身乃及友于視其不取見

其有餘紝青幾時冠鐵衣朱逢涌孰禦載馳載驅投紱  
滇池萬里接浙嘗藥視舉獲殫子職衰經游命禮經是  
式分節河南邊聲孔刷力障其衝旋復其失兩為地官  
不競不求廩枵而充泉壅而流惟瀛大郡實為甸侯先  
教後刑學宮以修昔貳若政衆與能事俾長榷司以修  
厥廢躬方脂壻奄忽云逝聞者盡傷矧予夙契子銘不  
愧予善實多剛而不虐從而不阿不膠於習不流於和  
有美承家其冠已哉曲周之澤發於盈科刺文樂石百

杞不磨

圭塘小藁卷十

欽定四庫全書

圭塘小藁卷十一

元 許有士 撰

贊

文文山畫像贊

并序

有士早慕文山公風節與其孫富遊嘗序公傳而未得  
拜公像意其雄傑峭異若太史公疑張子房為魁梧奇  
偉也富弟寔奉像求贊始遂瞻拜乃溫其如玉焉然其

栗而廉者不可捨也仁者必有勇公之謂也贊曰

精金不蝕貞玉不磷昆岡火炎乃流乃焚不流不焚孰為其真摧抑百至而力不劙間關萬狀而氣益振我公之心有如此水我人我民我疆我里獨有入海萬一振起天寶獻宋臣力竭矣慷慨就俘氣言益厲談笑燕市取義得義一言一動足為人師若曰父母有疾不可以難愈而不藥則百世之訓彝厚顏鄙夫偷生一時死何所遺壞腐冰澌公乃不死孰得而死之予今見公圖繪

固嚴霜烈日之梗槩而景星鳳凰尤足以慰後世快覩  
之思也

雪樓先生程楚公小像贊并序

有士昔來京師雪樓先生楚國文憲程公在翰林曾一  
再見之奔走四方不得日侍筆硯而知先生與議貢舉  
之有力也至正丙戌十一月諸孫世京奉小像示有士  
俾贊其左不敢以蕪陋辭也贊曰

楚郢故墟有樓屹屹世半知不修阻孰探由公著稱嘉

名遂洽于朔南公幼為學演迤泓涵曾未施抒勝國已  
戡楚材晉用乃獨挺夫梗楠持憲中外人革鄙貪掌帝  
之制音叶韶咸和不徇物剛不來讒引年勇退秋風片  
帆塵空萬事之擾擾雲護一室之潭潭松陰入座爐熏  
自參究清揚其如在耳肅肅乎名談昔貢舉之始行一  
廷議之二三天荒盡難乎歲茀鵠袍倏變而朱藍顧區  
區之不才至襲公之氷銜雖拜圖懷人希彷彿於萬一  
而度德量力祗足以重沙礫之慚也

澄上人龍贊并序

今上皇帝躍淵桂林報恩寺時釋師澄實住持宸翰超  
詣師有功焉皇帝即位之三年召入朝恩數隆渥可謂  
希世之遇已有士奏事明仁殿始識之將歸出墨龍求  
贊有士既禁其遇而復有感於龍也為之贊曰

九淵神龍屈伸惟時有天者隨龍不自知其屈也獮獮  
皆得而嗤亦莫得而我危其信也飛在天而雲行雨施  
萬國咸寧而一物不遺怨不爾報德則爾追是蓋善善

急而惡懸緩又天心之仁愛而實寓至公之無私使子  
高而有知九原之下寧不深愧於我師也邪

雲林小像贊

蔡仲謙  
蓮使

氣清而神完外癯而內腴御暴嬰難持志無撓刺繁治  
劇游刃有餘自己瘁於數歷友方樂乎樵漁經費需才  
鋒車突如曾未期月山積海輸鳳池訏謨其席屢虛吏  
垢待刮而民瘼仰蘇清泉白石雲樹茆廬胡為乎歸歟

如愚先生畫像贊

并序

仇侯公度守晉寧政成歸燕燕其里也復命典大郡力辭於未及之年平生慕古人假古物以寓其意又自號古愚聞于時一日詔書某曰吾友胡助亦古愚也茲以古愚獨歸胡而更曰如愚客有工繪貌予惟肖微子一語其勿斬夫名而字古也復冠以號今也濶濶雷同焉得而避之昔有同姓字於一時若杜子夏者未聞易而避之也字且不避况字之外者乎何獨公度介然自別於胡哉予始聞而疑之即其號求其志而後有以見公

度之力於進修而其志有在也末世滋偽聖人發古愚今愚之歎以其挾私妄作又不若徑行自遂之為疾也如愚顏子也聖人與言有聽受無問難蓋其真積力久觸處洞然但見其不違如愚退省其私則皆足以發明夫子之道然後知其不愚焉公度慕古人者也非古之愚者也慕古人而師顏子有餘師矣自古愚而為如愚自如愚而為不愚得之於心有不可名者已號與像云乎哉贊曰

謂其不愚黠乎其外謂其果愚瞞乎其內以為古之愚  
則思不暗昧而行不自遂生乎今之世尚論古之人而  
無愧左圖右書以游以藏淵而時出絅而日章樂不可  
名號孰爾臧殆將造夫心齋坐忘之鄉者乎

銘

守約齋銘

孟傳孔道三聖以承孟舍何人乃謂似曾因其養勇無  
懼為主擬非等倫氣象是取不能必勝是亦得要守氣

一身寧久無暴反身循理是為守約猶綱在綱猶機度  
括循循善誘亦惟以禮推而施博能事畢矣

亦山堂銘

并序

贈江浙行省參知政事北山徐公吾鄉之耆英也仲子  
漢臣掾中書以兄周臣入為參議改他官名與秩日起  
拜御史出僉兩道皆有聲周臣卒無子棄官歸經理其  
家且以子後之先塋久不治樹築有加表碣儀物磬石  
林立凡周臣齋志地下者舉畢之可謂能子弟矣遷浙

西道以母老不赴日相遇從承示伯生虞學士所為亦  
山堂記乃知漢臣抒義北山而自號亦山請益惟謹漢  
臣孝於親弟於兄根本既立而又有伯生之文茂以益  
之矣辭不獲乃為之銘曰

繫士為學奚假外求世美克濟厥德允修家有餘師巖  
巖在前重厚其體振古不遷含雲蓄雨利澤由施在人  
取象子孫以之止而有容器車攸出皇皇乘輶以嗣以  
續吾翁此山吾亦此山于羹于牆有儼堂顏師不在人

乃在吾翁義不在山乃在吾躬隱鄙捷徑厓或興寶跬  
步或違壑譏峯謗曷哉繼志母虧一簣山亦子名人亦  
子畏

辭

哈斯布色哀辭

哈斯布色取父字姓丁字文苑于闐人與予同登乙卯進  
士第倅固安州掾左司除禮部主事予佐吏部故游從  
為多改秘書著作拜監察御史又與予同官南坡之變

梟獍黨與列據津要文苑喀喇子山暨予實同論列遷  
戶部員外郎予在左司計事率相見俄僉浙西道廉訪  
司事遂間南北予居武昌適移湖北新制憲官各色止  
用一人長憲者同出西域即日引退臺報不允文苑曰  
無例且退持疑文冒進可乎堅臥不起予跼居絕人事  
獨相往來鵠山楚觀之絕頂梵宮琳宇之僻地荒城廢  
壘村居埜池靡不至焉時絕天登大別宿郎官湖賦詩  
談論無虛日一日把酒相屬曰人生離合有數君聞我

退機適相投但恐造物見妬不終遂此先子監祁陽縣  
有惠政潛德未章子亟銘予不獲辭焉未幾予除兩淮  
轉運使文苑移山北鄙報同日至山北置大寧白霄地  
去京師東北尚八百里陸不可挈家水縈紆餘五十里  
扶病擁幼殆不能為謀予官揚州崎嶇來過曰我非瀆  
於進也主上新政不敢不行而老幼累我且都而杭杭  
而鄂鄂又山北有力且疲况貧乎鄂不可留揚米貴不  
可居杭吾樂之穀又差賤且其人德我吾謀定矣乃命

諸子買舟而東獨挈一小僕乘傳而北予留之飲三晝夜而後去酒中嘗曰我作事素勇今殊猶豫何也予戲之曰人改常不佳君豈厭世邪迺大笑曰昔溫公記宋子才暴謹其言偶驗我不信也因出臂示其堅實曰斧吾擊亦不死也於廩今迺真死矣蓋時方大疫暑行至東平主僕皆病歸抵淮安卒于舟中至順元年六月二十三日也郡大夫率其國人斂之予既為位哭遣人省其墓告其家子穆蘇迎柩歸艤舟餞別之地哭為之慟

監郡公塋祁陽遠不能祔予欲蜀岡買地處之穆蘓曰  
杭西山先人所愛因可守也遂謀塋焉母子力不能舉  
漕司暨它官府若嘗往來共贖之得楮幣中統餘萬緡  
既襄事可經理其家淮東憲長達爾瑪嘗同官閱其貧  
請贖於朝不報初文苑為固安隸京號難治民劉奉益  
橫甚寨祈烹五十羊聚羣不逞震動里閭執而發其椎  
埋焚剽數其事度不解逸去反肆誣搆詔大官雜問禁  
中辨析明直劉寘于法築堤堰三百里河以不害兩道

凜然折強暴如拉朽蜀兵未戢按郡直要衝布置施為  
若老於兵者統兵省臣薦其有將帥材可治邊事云內  
外持憲知無不言制吏輩噤不得出一語平居論事慷慨  
歎落一座盡傾遇則奮發勇往無前長于觀人某邪  
某詐默以相告後輒多驗作歌行豪宕如其人古詩清  
粹皆可傳也延祐初朝廷始以科舉取士天下之大才  
五十六人出官四方或懦於施或汙於賄歷歷在人得  
免詬議如文苑者無幾而天復中道畫之於戲惜哉予

昔銘監縣公謂其多善未報當在文苑今文苑壽才四十有七齋志以沒此又何邪豈天又尼其身而大其後邪天道是邪非邪予益惑矣嘗獨坐閱同年錄十六年間為鬼錄者十七人矣尚忍以區區聲利置胸中乎或者視為四海九州之人恝然無情予不忍也穆蘓將狀其行求予為銘而其狀不至為之辭以發其槩且以寫

予哀云

天之生才兮亦孔之艱前不知其幾世兮後復幾年何

林林之百萬兮獨斬於賢器方適用兮陶復不堅雲未  
雨而掃蕩兮華未實而摧殘豈增繳之在天兮惡有翼  
之高騫冥冥之中兮孰司其權昔君之北兮歌呼水懦  
今君之來兮丹旐翩翩藥膳匪良兮道路迷遭妻子睽  
隔兮良友棄捐我哀曷忘兮我言曷殫西山蒼蒼兮惟  
所便安玉樹森立兮澤流有源與伸於後兮以報其前  
破不可完兮逝不可旋惟生無愧兮雖沒猶存修短有  
數兮吾其舍旃馬革牖下兮非蟻則鳶九原有知兮其



然不然

圭塘小藁卷十一

欽定四庫全書

圭塘小藁卷十二

元 許有壬 撰

跋

跋織成宣和御書清淨經

唐安樂公主出降益州獻碧羅為花鳥大如黍米眼鼻  
觜甲皆備瞭視者方見之陸龜蒙紀錦裙謂其禽鳥花  
卉諦視條段斬絕分畫綈綈不可狀雖不可見想像不

遇景物精絕而亦疑其夸也若夫字畫見諸組織者大率僅能成字而筆意則未易得宜相張君藏織成宣和御書常清淨經一卷筆意之精不失毫髮機軸之異又有不可名言者面文背質判然二文而吻然一層不知當時之工何以施其功於機軸之間也因知碧羅錦裙非夸而又有不及者雖然奇則奇矣特一物爾而予因是深有感焉宣和間萬事已墮清淨經謂神好清而心擾之心好清而欲率之遣其欲而心自淨澄其心而神

自清嗚呼斯言足以為國矣知而不能踐徒從事組織之末祗增其多欲爾故予不暇論組織之工而深有感於是焉是卷出沒之詳同年歐陽原功敘之矣其已卯冬與予同觀蓋庚辰冬也

跋重刻羊祜碑

墮淚碑在天地間與元氣相為無窮昔之亡也有不亡者存蓋立德立功立言有一於此足以不亡况備之者乎太傅之未就交辟也郭奕以為今之顏子其德之著

見者若此委質而後大勲偉績史不勝書其功懋矣若夫論三年之喪欲革漢魏之薄而興先王之法以敦風俗其於立言蓋有儒者之風焉使及孔氏其殆庶幾乎陸抗謂樂毅諸葛孔明不能過未足以盡之也李商隱因韓子淮西碑有言湯盤孔鼎有述作今無其器存其辭辭之精絕者不託於器且不可泯况德之浹人肌骨者乎昔太傅造峴山言自有宇宙便有此山余謂但有峴山便有太傅且人皆因碑而傳是碑由梁及今至于

四刺則因有以著不亦異乎訪舊文而刺之石由京師而致之峴首者編修官楊伊志卿也

跋顏魯公墨蹟盧侯帖

顏太師風節傑出千古脫翰墨未盡善思其人撫其蹟猶當寶襲齊沐九頓首而後展視况畢天下之能事者乎世說說有真偽之辨苟稱太師予即寶之况仲謙尚書所藏盧侯帖其為真蹟昭昭無疑者哉松雪翁以平生見十六帖為幸其所稱馬病帖則予得之又獲觀此

帖是亦幸之又幸者也

跋陳尚庭告

唐天寶三載開江縣尉陳尚庭告一通一時擬官者四十九人湮沒不稱者多矣而署銜於首者李林甫也林甫之惡半載不磨雖欲如當時選人之湮沒不稱不可得也吁可畏也哉

題

題歐陽文忠公告

文與道一而天下之治盛文與道二而天下之教衰經籍而下士之立言力非不勤也辭非不工也施之於用卒害其政者與道二焉爾昔蘇子以韓愈配孟子而以歐陽子配韓愈天下以為知言後世無敢有異議者韓也歐陽也推而達於孔氏之道也歐陽子曰三代而上治出於一而禮樂達於天下三代而下治出於二而禮樂為虛名又曰我所謂文必與道俱嗚呼此歐陽子之所以為文而先儒謂自荀揚以下皆不能及者也有士

幼讀其書即知好之見其紓徐委備容與閒易初若易入望洋而嘆而後知其大且至也翰林直學士兼國子祭酒玄原功其後也登延祐乙卯進士第名能為古文潁州後子孫散而四方能世其學者原功爾出所藏至和元年五月告身示有壬曰太師為龍圖閣直學士尚書吏部郎中留守南京時罹太夫人憂服除以舊職除此其告也陵谷變遷歸然獨存傳而至玄玄也歷胄館金閣奉常太史幸不至墮世業子吾同年其為識其左

又曰子以參議中書省事母憂去官服除亦以前職召  
古今事有相契者其併記之有士早讀歐陽子得與其  
後同年而又相好故敢以謾聞識之若夫德業之不完  
而以迹之粗類者委之豈原功私我之深遂忘其擬人  
以倫而傷其知人之明邪將原功警我以希賢之學邪  
警我以希賢之學也則不敢不勉

題李士誠持信手卷

說文曰印執政所持信也劉氏釋名曰印信也所以封

物為驗也亦言因也封物相因付也大抵皆有官者所用隨其職給於上後世人始自為今易水時有得大不過三五分其文率不同他出諸土者班班可見皆私作持以為信者也然莫盛於近代士大夫簡牘題詠既書姓名必繼以印哆然標榜以為粉澤予素疎但書姓名乃有刺而見贈因求印其上者甚至有假為者厥後馴習積至盈篋蓋不能免俗焉時之所尚若是雖近文事其亦文之末也夫世稱圖書甚無謂實印爾其控用銅

若象若木之堅緻者惟舉世尚之故製作日精然皆出  
江南北工未聞也吾鄉李士誠是藝之精無愧南工蓋  
其翁學於江右文生而士誠傳其家法焉求扁室顏本  
之說文以持信扁之且使知其槩庶不為俗工

文

武昌新居上梁文

伏以廣廈千萬間尚欲芘寒士風雨來書三十載始能  
有京師屋廬昔賢負山斗之名終身無樓臺之地迂疎

涉世我何人斯因循為家知幾年矣朝臺暮省已多索  
米之譏春誦夏弦靡獲棲身之所舉室每安於薄祿斯  
言可質於上蒼徒費伯氏之贊莫制中人之產草門圭  
竇揣分自宜畫棟朱門效蟬奚暇身常走俗難求都超  
之辨資才乏驚人敢慕文昌之買宅但未克高飛而遠  
走又不能穴處以巢居跼蹐連房與在舟而何異紛紜  
挿架任充棟以莫容長者出庭幼或突面左足下榻右  
已及階潦入則奧亦橫流雪積而勢將下壓幸人境得

一區之隙念農夫猶五畝之居天上歸來方欲采山釣  
水人間走徧恰知問舍求田此邦較楚俗而差淳故鄉  
如并州而在是臘脂入畫愴先子之曾留鳳凰來儀儼  
前峰之如揖雲間紫闈晚景侵尋眼底青山中原咫尺  
幸便途於桑梓愛從事於楩楠欲罷不能與奢寧儉叔  
芳督斧斤之役深入山林季也司楨榦之勞實崇基址  
拮据集事老子獨慚周旋相攸拙謀時與雖墳篋於率  
作亦杖屨以遨嬉此蓋席世澤詩書之餘所以見今日

輪奐之美棖題數尺固得志所不為堂構百丈以貽謀  
則可繼如翬如跂豈事外觀苟合苟完具存昔訓上棟  
下宇既成始有之功前書後琴行遂閒居之樂言之不  
足發而為詩 東黃鵠嵯峨繁翠中堂有棣華庭有桂  
從今無日不春風 南烟樹雲峰可並參要就離明明  
舊學肯將風物作清談 西江漢滔滔太別低清晝憑  
軒時俯看我山真是步雲梯 北家世柏臺曾種德洹  
溪松柏鬱如雲勿為安居忘祖力 上認取仰高真氣

象一堂莫道止於斯堂外青天十萬丈下玉樹芝蘭  
多俊雅臧獲趨承有不齊西銘要念同胞者

伏願上梁之後兄友弟敬直須學萬石君家資厚積饒  
不必與千戶侯等自頌若此惟天祐之

圭塘小藁卷十二

欽定四庫全書

圭塘小藁卷十三

元 許有壬 楪

長短句

水調歌頭

題蕭獨清  
山水勝處

山水據全勝消得獨清人神仙定在何處此處可尋真  
山有蓬萊氣象水是瀛洲風物人是葛天民覩得紫芝  
老吟盡碧桃春 四時花千日酒一溪雲回頭下望濁

世無地不紅塵憶昔乘軺江右目斷丹霞翠壁底事走  
跋跋今日送君語聊為自移文

二即席贈河南  
廉使高辛甫

徒陽記同署三十四年過朝臺暮省蹤跡贏得鬢雙皤  
一別又逾一紀百歲都能幾見塵事日蹉跎今夕復何  
夕旌節照山阿笑年來洹水上試漁蓑迂疎久厭城  
市其奈故人何浩蕩雲山烟水寥落晨星霜木如子已  
無多邂逅一尊酒忍負醉時歌

沁園春

寄題詹事丞張布孟  
鯽然亭用王繼學韻

俯仰乾坤傲晚羲，優游快哉看平湖。秋碧淨隨天去，  
亂峰煙翠飛入窓來。鴻鵠翱翔雲霄寒，寥廓斥鶴蓬蒿莫。  
見猜門常閉，怕等閒踏破滿院蒼苔。人間暮省朝臺奈，  
烏兔堂堂挽不迴。愛小軒月落夢驚風，竹空江歲晚。  
詩到寒梅兩鬢清霜一襟豪氣舉，世相知獨此杯。京華客問九衢何處堪避風埃。

二 自述

弱冠離家浪走人間餘三十年奈救時才短虛塵政府  
讀書功少深負經筵風月西清冰霜栢署一歲中間漫  
幾遷君恩重便不教覆餗直許歸田 豐碑高表洹阡  
又飛上吳頭萬里船把家傳圖史拂除塵蠹舊裁松竹  
收貯雲烟大別嵯峨鵠山縹渺盡在先生几案前閒人  
事但登樓小酌閉戶高眠

木蘭花慢

至大戊申八月二十五日同陳仙萬戶游城南廬園甲京師主人坐雲

左丞未老休致清露堂扁命子二人分賦長短句予得清字皆即席成章喜甚榜之堂上陳仙

其甥也後更  
號酸齋云

渺西風天地拂吟袖出重城正秋滿名園松枯石潤竹  
瘦霜清扁舟采菱歌斷但一泓寒碧畫橋平放眼奇觀  
臺上太行飛入簾楹主人聲利一毫輕愛客見高情  
便炎剥驪珠蓮分冰繭酒注金瓶風流故家文獻况登  
高能賦有諸甥清露堂前好月多應喜我留名

摸魚子

中都錢荀平叔  
都事赴大都

正荒寒似逃空谷佳人又話離別風低白草天無際漠

漠平沙如雪心欲折看落日飛鴻一線明還滅長歌激烈把湖海襟期關山風物取次付彈鋏毛錐子千古鑽研搜刻誰知更比鳩拙仰宣不作登樓賦閒殺一天秋色珊瑚玦羨公去鳴騶醉上長安陌予懷轉結怕紫塞寒深碧雲暮合酒醒見明月

水龍吟

趙伯寧中丞代祀淮浙過維揚徵賦

五雲飛出蓬萊天杳散滿人間世龍翔鳳翥千齡一遇明良慶會節鉞重來士民騰喜山川增氣想四方地遠

九重心切都要見問閻事 寢寐天顏咫尺裏秋風一  
鞭歸騎青年勲業烏臺倚重紫垣虛位自顧疎庸資身  
無策敢論經費但儒酸不改作鹹充賦助和美味

二 遊三  
臺

幾年三到三臺往年不似今年好故人雲集遠山屏列  
蔚藍清曉趙舞燕歌一時奇絕百壺傾倒對山川如昔  
風烟不減但人比當時老 放眼秋容無際碧澄澄鴈  
天霜早曾瞞事業悠悠斜日茫茫衰草為問漳流古來

豪傑浪淘多少有建安遺瓦張吾筆陣把姦雄掃

三

予一病五十日始愈因自點檢目視雖不如昔書字稍大者尚可夜讀手可揮翰足可步園腹可容酒齒可齧肉耳可聽歌體稟素弱今六十有七而得所謂六可者私自喜幸戲成此曲子之所慎疾也乃深寓節飲之意焉

可翁點檢形骸關心六事今猶可摩杪老眼殘編細讀

小窓危坐信手揮毫雲烟撩亂波濤掀簸笑蹣跚病足  
登山不武尚能踏苔痕破便腹還堪容酒齒牙攻脯  
殼蔬果歌聲到耳宮商少誤肯教輕過饒口如門丁寧  
告戒却須堅鎖怕麴生徒衆羣然趨入困風流我

賀新郎

登滕王閣用稼軒韻

陳迹空鳬渚悵繁華等閒一夢便成今古佩玉鳴鑾人  
如畫何處為雲為雨只明月還生春浦帝子當時無窮  
欲奈浮雲回首渾非故天有意肯輕許江湖襟帶雄

吳楚更翩翩三王文采儼章駢句一旦飛來辛家筆才  
見龍翔鳳舞漫千載懷人延竚豪傑紛紛今誰在笑世  
間華屋爭寒暑瀛海遠去無侶

滿江紅

次湯碧山  
清溪韻

木落霜清水底見金陵城郭都莫問南朝興廢人生哀  
樂載酒時時尋伴侣倚闌處處皆樓閣對溪雲試放醉  
時狂渾如昨沙洲外輕鷗落風帘下扁舟泊更寒波  
搖漾綠蓑青箬為向九原江總道繁華何似今涼薄怕

素衣京洛染繙塵從新濯

二 和郭子敬夏  
日村居韻

一曲清溪收拾盡風聲月色還自笑六旬將近數椽方  
算已分封侯非燕領儘教有地爭蝸角筭人生難得是  
清閒吾今得離離黍芃芃麥觀此景皆真樂更葵花  
未謝藕花仍發繁劇只因詩有債迂疎却喜門無客問  
小亭盛暑不容人今秋月

滿庭芳

惜春士安馬明初  
登荀和叔廣恩樓

沙路無泥柳風如水嫩涼偏入吟鞍廣思樓上雨後看  
西山回首炎氛千丈便長嘯跳出塵寰青天外斜陽淡  
淡倦鳥正飛還 郊原秋色裏望窮霄壤倚偏闌干問  
神仙何處獨占高寒樓下悠悠洹水為底事不駛休閒  
吾衰矣休將舊手遮日上長安

二

槐院風清蘚階塵淨日長鎮掩衡門葛幃藤簟石枕竹  
夫人不作南柯痴夢要來往月窟天根花陰轉間關幽

鳥啼破一窓雲 起來盤膝坐松風沸鼎花雪浮春便  
洗除胸次多少凝塵更喜秋原有月籬頭貯小甕清尊  
東籬下黃花香裏顛倒白綸巾

三

庚寅正月十六  
日夜獨酌戲成

學本迂疎才非明哲天恩偶聽歸田良辰美景相遇更  
欣然細數人生行止或城市或在林泉都評過忘形適  
意惟是在尊前 只今頭盡白但憐飲量不似當年甚  
藥癆媒渴無事招愆時有親朋來勸學康節微醉為賢

先生笑偶當乘興又作飲中仙

望月婆羅門引

借王仁甫左丞賈伯堅左司朝罷過李廷秀參議因觀盆梅遂

成懽酌廷秀求

詞醉中賦此

紫宸朝罷東風吹到謫仙家  
詔裘抖擻塵沙一室窓明  
几淨人境獨清華有息齋名畫殿帥高茶  
主人意佳道分手即天涯  
何事相逢不飲咸咸嗟嗟黃封旋拆有  
鵝腊雞胸與兔羓公不飲辜負梅花

二

雪夜宴沙班良輔家時為湖南宣慰使

人家十萬春風先到使君家天公更助芳華盡把樓臺  
粉澤瓊樹映橫斜要歌宜白雪暖借流霞 吳姬趙娃  
亂銀燭影交加不放行雲歸去敲碎紅牙可憐杜老肯  
飛送江頭只岸花爭似我夜醉長沙

江城子

次韻

懶如沙鳥拙如鳩為無求得無憂底事疎狂却效子長  
遊畢竟無求何用出求不得亦宜休 西風真欲釀羈  
愁試登樓望南州黃葉疎雲搖蕩一川秋更被誰家多

事笛聲不盡思悠悠

二 飲海子舟中班彥功  
招飲斜街以此答之

柳梢烟重滴春嬌傍天橋住蘭橈吹暖香雲何處一聲  
簫天上廣寒宮闕近金晃朗翠峩峩誰家花外酒旗  
高故相招儘飄搖我政悠然雲水永今朝休道斜街風  
物好才去此便塵囂

行香子

璧月香雲小院重門辨詩愁多是黃昏梨花淡淡柳絮

紛紛對古銅爐神品畫靚粧人半醉多羞一笑欺春  
有丹青描畫難真秋波側媚雲岫輕顰是蕊珠仙巫峽  
女洛川神

南鄉子

醉書月香亭柱几

老子分漁樵說著登山氣便豪天外長江流不盡迢迢  
腳底青雲步漸高兩手敢辭勞右有深杯左有螯我  
似淵明多一字陶陶明日黃花笑二毛

二

贈乾二絃胡  
琴高才甫

錦瑟思華年底用嘈嘈五十絃兩線清絲千萬調能傳  
句句分明字字圓 高藝擅華筵多少新聲出自然更  
著郭娘歌宛轉相聯消得詩人筆似椽

三 次可  
行韻

薄宦苦營營半世長亭復短亭一旦結茅當疊嶂雲屏  
朝暮陰晴幾樣青 濁酒瓦盆盛農父無才却有情好  
雨知時公到此安寧詰到盆空月滿庭

四 次可  
行韻

小隱遠民塵草舍三間柳作椽圍繞佳城才二頃山田  
便覺胸中綽綽然世態自爭妍老我壺觴業自專地  
闊天寬容舞袖回旋又似偷閒學少年

臨江仙

茶江萬梅方吐而予來長沙風雪十日晴後值大霜有懷而作

十日惡風三尺雪繁霜又滿人間梅花誰與問平安玉  
肌清似削爭奈許多寒夢繞琅瓈江上路竹籬茅舍  
青山莫教芳酒滯歸鞍黃昏無限月待我倚闌干

鵲橋仙

同李雲松宣慰值出書其壁

雲松仙客箕山道士來訪思齋老子思齋何處未歸來  
想只在翠紅鄉裏 風清月白橙黃蟹紫一巷笙歌紛  
起良宵不遇負佳賓都不念人生有幾

二 贈可  
行弟

花香滿院花陰滿地夜靜月明風細南坡一室小如舟  
都斂盡山林清致 竹簾半捲柴門不閉好箇暮春天  
氣長安多少曉雞聲管不到江南春睡

三 贈相士  
周可山

春秋七袞江湖萬里老子閑人多矣兩朝名勝一囊詩  
道渾似當年袞李紅塵陌上白雲堆裏擾擾浮生行  
止我非燕領虎頭人但酒聖詩狂而已

四 宴胡安常  
侍御家

清香華屋黃葵紅葉政是新涼時節丈園多病不勝杯  
韞負殺一庭秋色珍殼紛錯玉醅芳烈醉倒江湖狂  
客涼天佳月即中秋更有箇今年閏月

五

心閒勝貴身閒勝富已往而今始悟來言精力未宜閒  
此俗子便宜推去 秋風難泰山杖屨盡是幽人樂  
處儘教鬚鬢雪颶蕭蕭總不礙銜杯琢句

蝶戀花

九陌千門新雨後細染濃薰滿目春如繡恰信東君神  
妙手一宵綠徧官橋柳 樓下蘭舟樓上酒沙暖蘋香  
渾似來時候說與可人知信否傷春更比悲秋瘦

二 丁亥正月十三日親  
朋治其醉中賦此

老子行年過耳順蓬鬚飄蕭人道猶風韻領畧風光元  
有分賞心又喜燒燈近薄雪初消寒欲盡詞館多閒  
時得陪英俊便訝運朝為酒困東君已是傳花信

漁家傲

歌圭塘四時四首

水盡泉香雲縹渺韶華隱隱浮林杪酒在葫蘆魚在沼  
清晝悄好音時復來黃鳥管領風光心未老衰顏却  
怕清波照有酒可斟魚可釣能事了東風一曲漁家傲  
窓影脩篁搖翠葆牆陰幽逕連芳草暮地雨來荷葉闊

杳更好亂烟浮動紅雲島  
楫柳千條絲嫋嫋柳邊宜  
著艤舟小世態紛紛何足校  
收桂棹嗚嗚且和漁家傲  
露洗璇穹青杳杳年光紅入灘  
頭蓼翠蓋撐烟吹半倒  
霜信早一匝寒影磨清曉早是軒扉塵不到好山更  
與供登眺酒債漸多詩債少翻水調西風幾疊漁家傲  
落日崇臺寒力峭登臨恰似尋安道有竹何人能逕造  
吾不誚相逢要還掀髯笑雙檜凌空龍夭矯有知定  
訝人枯槁珍重歲寒冰雪操君自寶老夫但和漁家傲

太常引

武昌

別墅

臘脂山下老農家看雲樹翠交加香透小窓紗是昨夜  
幽蘭放花引泉澆竹破苔移菊更種故侯瓜一笑有  
生涯便休歎清霜鬢華

二

速可行  
治具

小齋瀟灑頗宜貧清有竹靜無塵俗子不敲門只風月  
烟霞是鄰古瓶清雅寒梅疎瘦昨是忽紛紛尚有一  
枝春快報與南廳主人

三 登樓觀柳

雪消春氣恰和柔先到柳梢頭數日不登樓笑青眼窺人尚羞清明近也老夫耄矣其忍負歡游飛絮便生愁儘都變浮萍去休

四 烏克章杜德常寓所  
二松可愛醉中賦此

二松如蓋偃中庭向朱夏作秋聲搖影動疎櫺掩映得苔痕轉青西清博士西臺御史相對又雙清咫尺到

蓬瀛休認作藍田縣丞

五

圭塘種藕已多時貼水曉星稀生意一朝回便萬柄紅  
酣綠敲連宵驟雨透空繁響清絕不容詩對景原闋



看高節停鸞

四

賞梅觀竹不暇饒黃獨白玉炊香連碧玉富殺山人林  
谷 幾年道路艱難眼明今日相看便結歲寒心友休  
教夢到槐安

五

題郭思誠山居

西巖仙老身在蓬萊島竹月松雲塵不到況有清風自  
掃 霜溪淺碧搖沙烟村落照明霞說與門前鷗鷺仙  
家又是漁家

憶秦娥

和布孟張  
中丞韻

山人笑人間不識山間妙  
山間妙嵐光浮動半江殘照  
移文莫待山英校烟霞曾結三生好  
三生好白雲深鎖葛洪丹竈

二

山瓢飲太空為幕雲為枕雲為枕松聲萬壑月明風冷  
人生未老宜先省塵寰儘有清閒境清閒境孤雲野鶴杳無蹤影

三

山花舞巖姿能笑禽能語禽能語百年心事一犁春雨  
神仙護短多官府老夫只解為農圃為農圃乾坤休  
問幾番今古

四

山雞唱少年中夜心悲壯心悲壯世間何事不來眉上  
迷途未遠奚惆悵五湖烟水春搖蕩春搖蕩誰知平  
地拍天風浪

五 送牛農  
師二首

春山碧詩成馬上應相憶應相憶盧溝橋畔晚烟如織  
人生有別休多惜但悲後會知何日知何日暮雲心  
緒斷鴻消息

六

長安陌東風楊柳花如雪花如雪青條無數為君攀折  
少年剛道輕離別臨岐未信心如鐵心如鐵舊懷新  
恨滿梁殘月

菩薩蠻

寄都下友人

憑高日望金臺路。黃沙盡處空烟樹。歲晚足蕭疎。雁聲無夜無。  
簿書憐俗態。人道儒酸在。何以慰相思。半年無好詩。

二寄中書  
諸公

三司笑面鞞紋皴。嵯峨官憔悴。非詩瘦紅袖。寫烏絲。誰曾夢見之。  
淮鹽真是白。染得須成雪。天上有神仙。能教

白復玄

浣溪沙

修黛橫愁苦愛顰顏霞亂玉更宜嗔嗅香按藥奈何春  
織就回文難盡意寫成離字也傷神他年不及卷中

人

二 護聖寺

汎舟

花露濃沾桂棹香柳風輕拂葛衣涼放歌深入水雲鄉  
荷葉杯中傾綠醑瓜皮船上載紅粧都堂何似住溪

堂

三遊記

卷十三

崖上留題破紫烟巖前淪茗挹清泉爛遊三日酒如川  
有水有山高士宅無風無雨小春天人間真見地行  
仙

如夢令

桃李春風不耐好在西山如黛策馬看山來政爾青青  
相待無奈無奈却被暮雲妨礙

二

一片蒼苔鑿破百折清泉分過長日午陰圓自挈胡牀  
來坐斯可斯可從此閒身屬我

三

昨夜庭梧墮翠詩思尤便爽氣無事要生悲可笑宋家  
多事衰矣衰矣但挾鄰翁酒味

四

火桶只宜春早紙帳不知天曉枕上問山僅門外雪深  
多少休掃休掃收拾老夫茶竈



圭塘小叢卷十三